

KEDATANGAN ULAMA AZHAR DENGAN IKHWANUL MUSLIMIN

Baharu-baharu ini, telah singgah di Singapura, rombongan dari ulama Shaykh al-Azhar Mesir yang diketuai oleh Shaykh ‘Abd al-Rahman Tāj, Shaykh al-Azhar dalam lawatan balik dari Indonesia setelah melawat di sana lebih daripada 20 hari lamanya. Barangkali inilah pertama kali dalam sejarah al-Azhar menghantarkan rombongannya ke Indonesia dan ke negeri-negeri Melayu ini. Lawatan-lawatan itu sudah barang tentu diatur oleh kerajaan Mesir dengan sebegitu rupa sehingga dengan melihat keadaan orang-orang yang dihantarkan itu, menurut pengertian keadaan-keadaan sekarang, bahawa lawatannya itu ada latar belakang di atas perkembangan kerajaan Mesir sesudah menjatuhkan dan menumbangkan kerajaan Najib dan menjahanamkan pergerakan Ikhwān al-Muslimīn dengan mengadakan pembunuhan-pembunuhan yang hebat kepada beberapa ulama-ulama Islam yang besar pengaruhnya kepada umat.

Menurut keterangan yang kita dapati bahawa lawatan itu disambut dengan tawar oleh pihak Masyumi kerana orang-orang Masyumi memandang bahawa hantaran itu adalah sebagai suatu percubaan menarik orang-orang Indonesia kepada suatu pengertian bahawa agama Islam itu hanya agama beribadat semata - tidak kena mengena dengan siyasah- agama itu hanya suatu perbuatan perseorangan- tidak ada dipermasyarakatannya kepada muslihat ketatanegaraan sebagaimana yang difahamkan dan diertikan oleh cita-cita Masyumi yang bersamaan pula dengan cita-cita Ikhwān al-Muslimīn yang ditaja oleh al-Marhum al-Shahīd al-Shaykh Hassan al-Bannā yang diharamkan oleh Jamāl ‘Abd al-Nasīr sekarang ini bahkan orang-orang Ikhwān al-Muslimīn diburu kerana bercita-cita menghapuskan sama sekali cita-cita ketatanegaraan Islam yang diperjuangkan oleh Ikhwanul Muslimin itu.

Tidak hairan kalau sambutan terhadap ulama-ulama al-Azhar itu lebih tawar lagi apabila yang menghantuinya al-Shaykh ‘Abd al-Rahman Tāj yang dikenakan telah pernah memberikan petuanya

mengkafirkan pergerakan Ikhwanul Muslimin yang dipercayai oleh orang-orang Islam di Indonesia bahawa taraf beliau samalah seperti keadaan kiyai-kiyai di Indonesia pada zaman penjajahan belanda dahulu- boleh digunakan untuk mencapai saran-saran siasah mempengaruhi rakyat supaya melupakan segala kejadian-kejadian yang pedih dideritai oleh umat Islam di atas keganasan dan kebuasan Jamāl ‘Abd al-Nasīr terhadap pemimpin-pemimpin Ikhwān al-Muslimīn sehingga seorang ulama besar seperti ‘Abd al-Qādir Awdah telah menjadi korban dengan tidak cukup usul periksa.

Langkah-langkah yang ganas yang menjadi sejarah yang gelap bagi Ikhwān al-Muslimīn itu menurut pendapat ini sekarang hendak diubati oleh Jamāl ‘Abd al-Nasīr dengan menghantarkan rombongan-rombongan ulama-ulama itu dan mengadakan pula hadiah kitab-kitab yang sangat didahagikan oleh Indonesia tetapi kerana dasarnya bukannya untuk membuka mata, untuk mencelikkan umat Indonesia yang telah celik itu maka kitab-kitab yang dihantarkan itu bukannya lagi kitab-kitab yang dikehendaki mereka seperti

karangan-karangan baharu yang menghidupkan roh dan semangat keislaman tetapi yang dihantarkan ialah kitab-kitab lama yang boleh dekat tidak berapa mendapat perhatian lagi di Indonesia.

Hantaran kitab-kitab itu adalah bersesuaian dengan kedatangan ulama-ulama yang dihantarkan kerana dengan sendirinya ulama-ulama yang dihantar itu bukanlah ulama-ulama yang progresif, ulama-ulama yang dapat menyesuaikan keadaan dengan masani tetapi ulama-ulama yang dipandang oleh orang-orang di Indonesia seakan-akan ulama-ulama yang bertujuan mematikan roh dan semangat Islam yang hidup di dalam jiwa orang-orang Islam sekarang.

Adalah menjadi suatu pertanyaan yang besar kepada orang-orang Indonesia khususnya orang-orang Masyumi, adakah hantaran itu suatu tujuan siyasah Jamāl ‘Abd al-Nasīr supaya umat Islam melupakan sama sekali apa yang telah dilakukannya terhadap kepada saudara-saudaranya daripada Ikhwān al-Muslimīn di Mesir?

Umat Islam di seluruh dunia mengetahui bahawa semenjak 20 tahun yang lalu al-Shaykh Ḥassan al-Bannā telah menaja Ikhwān al-Muslimīn setelah melihat bahawa pemerintahan Mesir yang dijulung itu adalah satu pemerintahan yang dipandang sebagai negeri Islam tetapi perbuatan dan segala kejadian di dalam masyarakatnya berlawanan dengan ajaran-ajaran Islam. Pengaruh *adabiyah* barat telah mendalam kepadanya dan kerana itu tajaan Ikhwanul Muslimin diadakan suatu cita-cita supaya di Mesir hendaklah dilakukan hukum-hukum Allah- hukum-hukum Allah mengikut ketatanegaraan dijalankan. Ini ialah sebagai suatu tugas kepada tiap-tiap orang Islam dan diwajibkan kepada mereka di mana mereka tinggal.

Dalam masa cita-cita yang suci murni itu marak dan mendapat perhatian di seluruh dunia maka pada masa itulah pemimpinnya al-Sheikh Hassan al-Banna ditembak oleh musuh-musuh Islam kerana musuh-musuh Islam mengetahui apabila dibiarkan sudah tentu cita-cita itu sampai dan mereka tidak dapat berleluasa



Ibu Sudiro segang memotong peta dalam pembukaan sebuah tempat pemeriksaan gigi di Indonesia

lagi menjalankan kemahuan hawa nafsu mereka dengan jalan yang tidak berpandu kepada al-Kitab dan al-Sunnah.

Sesudah itu maka jarum pemerintah dengan cara yang licin dan kasar juga telah mencari jalan memecahkan orang-orang Ikhwan sehingga dengan yang demikian timbullah perpecahan itu apabila setengah-setengah pemimpinnya memandang kerusi lebih berguna daripada muslihat Ikhwan sebab itulah beberapa orang pemimpin Ikhwān sekarang didapati bekerja di dalam jemaah menteri ‘Abd al-Nasīr yang memerintah Mesir sekarang.

Adakah dengan langkah-langkah yang dilakukan oleh Jamāl ‘Abd al-Nasīr itu Ikhwān al-Muslimīn akan hapus? Inilah soalan yang pernah kita tanyakan kepada rombongan itu di dalam masa bercakap-cakap. Mereka tidak mau menjawab tetapi kita faham bahawa Ikhwān al-Muslimīn di Mesir masih ada masih hidup dan bergerak- Mereka tidak akan hapus selagi cita-cita dan kewajipan mereka untuk menegakkan kalimah Allah di negaranya belum sampai.